



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Janeiru 2012

Edisaun : 19 Janeiru 2012

Tribunál Distritál Dili kontinua halo julgamentu ba kazu maus-tratus ba kónjuje

Iha loron 13 Fulan Janeiru 2012 Tribunál Distritál Dili hahu kontinua halo prosesu julgamentu ba kazu maus tratus ba kónjuje ho numeru prosesu 293/TDD/2012. Arguidu ba kazu ne'e ho inisial MDS ne'ebé komete krime hasoru nia kónjuje ho inisial PDS. Kazu ne'e akontese iha loron 15 fulan Janeiru 2010, maiz ou menuz iha oras tuku 10 kalan, iha Aldeia Beluli, Suco Poetete, Sub Distrito Ermera, Distrito Ermera.

Prosesu julgamentu ne'e dirije ho kompozisaun juiz kolektivu ne'ebé kompostu husi Dra. Rosa Maria Brandão nu'udar juiz presidente no Dr. João Ribeiro no Paulo Texeira, husi Ministériu Públiku reprezenta husi Dr. Domingos Barreto no arguidu hetan asisténsia legál husi Dr. Manuel Lito Exposto husi Eskritória Defensória Públiku.

Direitór JSMP Luis de Oliveira Sampaio haktuir katak, *JSMP haksolok tanbá tribunál sira kontinua fo prioridade atu halo prosesu ba kazu maus tratus ba kónjuje nu'udar pasu ida hodi prevene kazu violénsia doméstika iha sociedade ida ne'e no atu kumpri obrigasaun estadu nian hodi luta kontra violénsia hasoru fetu.*

Tuir observasaun JSMP nian katak bázeia ba faktus ne'ebé produz iha julgamentu laran hatudu katak arguidu diskonfia sofre moras anómalia psikika ka bulak. Tanbá ne'e, tribunál rekomenda atu halo ezame psikolojiku atu deskobre lolos situasaun ne'e. Depois halo tiha ezame médiku prova katak arguidu la sofre moras refere. Faktus ne'ebé produz durante julgamentu laran, hatudu katak arguidu provadu prátika aktu violénsia doméstika ka maus tratus hasoru nia fen ka kónjuje. Motivu husi akontesimentu ne'e, tanbá arguidu diskonfia lezada prátika vida adulteriu (*selingkuh*) ho mane seluk. Tanbá ne'e, provoka arguidu hodi baku, tuku, tebe, no rasta vítima ba rai.

Iha parte seluk, tuir deklarasaun lezada nian haktuir katak prátika violénsia doméstika hirak hanesan baku, tuku, tebe no asaun violentu sira seluk sempre akontese hela deit iha nia moris bainhira arguidu mai ho kondisaun lanu.

Bázeia faktus hirak ne'e Ministériu Públiku akuza arguidu ho artigu 154 Kódigu Penál ho pena tinan 2 to 6 prizaun konabá maus tratus ba kónjuje.

Iha tribunál, arguidu mós deklara katak los duni nia baku nia fen hanesan dadaun lezada deklara ba tribunál ne'e.

Tuir Observasaun JSMP nian, durante julgamentu arguidu lahatudu arepedementu/*penyesalan* ba hahalok ne`ebé nia halo no arguidu tenta koalía no halo an hanesan ema bulak.

Bázeia ba faktus hirak ne'e, Ministériu Públiku iha ninia alegasaun finál alega katak, faktus hirak ne`e akontese no refleta duni produsaun provas iha julgamentu laran. Tanbá ne'e husu ba tribunál kompetente atu aplika pena ne`ebé merese hanesan regula iha artigu 154 Kódigu Penál nune'e arguidu labele prátika tan ninia hahalok ne'e iha tempu ikus.

Relasiona ho faktus sira ne`ebé produz iha audiénsia julgamentu laran, JSMP husu ba tribunál atu bele aplika pena ne`ebé mais adekuada no justu atu refleta sofrémentu ne`ebé lezada simu durante ne'e, no iha tempu hanesan atu kurize prátika sira ne`ebé violentu la bele akontese tan iha futuru.

Prosesu julgamentu ba rona leitura akordaun iha loron 23 fulan Janeiru 2012 oras tuku 14.00 lorokraik

Atu hetan informasaun kle'an, favor kontaktu:

Luis de Oliveira Sampaio
Diretór Ezekutivu JSMP
Email: luis@jsmp.minihub.org
Landline: +670 3323883/7295795
Website: www.jsmp.minihub.org